

## SLAM     Vorstand Graue Panther

Dr **Peter** - ä huere gäbige Cheib!

Immer mit Hund oder Velo unterwegs: ganz nach em Motto vom Albert Einstein, wo gmeint het: „*me muess sich vorwärts bewege, um s'Glychgwicht nit z'verliere*“.

Liebe Peter, dyni Liebi isch s'Ökolampad, und denn schafft erscht no dyni Liebi dort. E Win - Win Situation für di, und für uns Graui Panther e Win. Danke, Peter.

Übrigens, s'gäb dort au Tanz für Seniorinnen, hani gläse. D'bz het titlet: „*Wysswhy, Tango und kleini Flirts*“. Verzellsch ys emol ebitz drvo, Peter?

D'**Regula** isch kompetänt, dasch evidänt, e politisch Talänt, intelligänt und presänt jede Momänt, immer im Elemänt, drum het si ain vo de schwirygschte Jöbs im Baselbiet: Presidäntin vom Gmeiniverband.

Si beherrscht dr Spagat: für d'Jugend in Birsfälde zueständig gsy, für die eltere Mensche bi uns als Co-Presidäntin. Dr Spagat het si vererbt: d'Tochter Cécile het ihn nochmacht, als Wältmeischerin im Rhönrad.

Dr **Thomas**, allewyyl us Därwil, als Presi vo dr Mitti Därwil duet är drfür Sorge, dass syni Partei meh Mitglierd kriegt, im Gegesatz zur Kirche, wo d'Lüt laufend drvo laufe – und wenn das bi däne so wyter goht, wird au dr lieb Gott no us dr Kirche usträte! - herrgottnomol!

Aber mir Alte chönne jo immer no bäte, zum Byspil: «*Oben klar und unten dicht, lieber Gott, mehr will ich nicht.*»

Und denn hämmer jetzt au no e graue Bär bide Graue Panther: nid e Bärbock oder e Bärfuss, nid e Baer-Käs oder d'Bär-Bank, sondern e Bär-Locher.

Ich han e spezielli Verbundeheit mit em **Thomas**, obwohl mir nit dr glych Coiffeur hän. Ich bi nämli mit syne Brüedere bide Pfadi gsy, scho damals e grossi, tolli Familie, wo nit usstirbt, wie d'Brunbäre in dr Schwyz.

Dr **Urs** het die wichtigschti Funktion: mit ihm muess me chönne rächne, uf ihn muess me chönne zelle, aber är muess chönne rächne und zelle. Är muess luege, dass au mir alte keini grosse Sprüng me mache. Nid nume wäg dr Osteoporose, sondern wäge dr Prognose, dass s'Vermöge schmilzt.

Aber wie wotsch dr Gürtel änger schnalle, wenn s'Ränzli ständig wachst?

Au dr **Heinz** het's mit em Gäld, mit em Gleigäld, nid das in der Kasse, sondern das vom Himmel, wie syni Lyrik heisst. Für ihn isch es sy „Läbensschatz“, für uns eifach Poesie vom feinschte, zum gniesse.

Und denn isch dr Heinz unser Heinzelmännli: chum isch d'Versammlig verby het är scho n'e Bricht drüber anezauberet.

Und denn no d'Panther Post: jedesmol au e Kunschtwärk – und vyl, vyl Arbet. Ich dänk, für dr Heinz bedüet d'**A H V = Agenda Huere Voll**.

**Max**, dr'Mister 55 plus, denn mit 55 plus isch no lang nid Schluss. Als pensionierte Schuelmeischer muess dr Max nüm so läbe, wie vyli Lehrer, nämli die, wo am Vormidag rächt hän und am Nomidag frey. Nei, är setzt Prioritäte, wo n'ich bewundere: är verlosst d'Vorstandssitzig vorzytig und goht de Grossvatter Pflichte noch. Sichtlich mit Plausch und im Wüsse, dass är ein vo däne hütende Grosseltere isch, wo em Staat jöhrlich acht Milliarde spare hälfe.

D'**Ursina** vo Zäsige macht d'Graue Panther gränzüberschrytend. Si bringt ys s'pflägerische Knowhow und dr Umgang mit Demenz nohch. Für si isch klar, dass nid alli Alte im Kopf chönne klar blybe, aber si weiss au: zum Glück wird s'Härz nie demänt.

Danke, **Rita**, dasch e super Stärbeveranstaltig gsy in Lieschtl. Au d'Stedter sin ins Stettli pilgeret.

D'Rita weiss, am ene Tag wärde mir alli stärke, aber an allne andere Täg stärke mir nit! Drum träumt si nid s'Läbe, sondern läbt ihre Traum - und wohnt imene Mehr-Generatione-Hus.

D'**Doris**, unseri Vize, het's Rebellische im Bluet. Schliesslich isch si d'Änkelin vom Robert Kehrli, wo als überzügte Anti-Faschist Flüchtling grettet het und wägem Widerstand gege d'Nazi ganzi 5 Jahr hinter Gitter gsy isch.

Är het emol zur kleine Doris gseit: «*Meitli, du muesch nid alles glaube. Du muesch immer sälber dänke und denn handle.*» Zwar nüm Meitli, aber genau so erläbe mir d'Doris hüt no.

D'**Marianne**, la Grande Dame, wo uf dr Alp wohnt. Nit nume flyssig isch si hinter dr Kaffibar, au syt Menschedänke bi VASOS und im SSR aktiv.

Blybt no dr **Marc**: für ihn zelle vor allem die innere Wärt: das sin bi ihm: d'Bluetwärt, Zuckerwärt, Läberwärt ...

Wo n är vor 20 Jahr als Landrot überraschend Finanzkommissionspresidänt worde n'isch, het är sich gseit: „Solang die katholische Pfarrer Ehevorbereitigskürs chönne gä, chan är au d'Fiko leite. Es het immerhin für 12 Jahr g'längt.“

Hüt meint är, är blybi aktiv, will dr sogenannti Ruhestand gföhrlich isch – es het ihn no niemer überläbt.

Drum chame au im Alter no Unsinn mache, eifach e bitzli bedächtiger. Und mir wüsse, die Junge chönne zwar schnäller renne, aber mir Alte kenne d'Abkürzige.

Danke

19. August 2024

Marc Joset